



557/4-1/21
26-01-2021

თელავის მუნიციპალიტეტს

როგორც მოგეხსენებათ, საქართველოს პარლამენტის გენდერული თანასწორობის საბჭოს ფარგლებში განხორციელდა თემატური მოკვლევა „**პროფესიული განათლება ქალთა ეკონომიკური გაძლიერებისთვის**“. თემატური მოკვლევის ჯგუფმა შეიმუშავა ანგარიში, რომელიც გამოქვეყნდა 2019 წელს. ანგარიშში მოცემულია რეკომენდაციები კონკრეტული უწყებების მიმართ.

თემატური მოკვლევის „პროფესიული განათლება ქალთა ეკონომიკური გაძლიერებისთვის“ ფარგლებში თემატური მოკვლევის ჯგუფმა შეისწავლა სამთავრობო პოლიტიკა, სტრატეგიები და ადგილობრივი პოლიტიკა ქალებისთვის პროფესიული განათლების ხელმისაწვდომობის კუთხით. თემატური მოკვლევის ანგარიშში წარმოდგენილი მიგნებები ეფუძნება მოკვლევის მრავალმხრივი ჩართულობით წარმართულ პროცესს, რომელშიც გათვალისწინებულია როგორც წერილობითი მოსაზრებები, ისე - საქართველოს პარლამენტში გამართული ორი ზეპირი მოსმენის შედეგები და პროფესიულ განათლებაზე უკვე არსებული კვლევები.

ანგარიშში მოცემულია ის დაბრკოლებები, რომლებიც ხელს უშლის ქალებს ჩაერთონ პროფესიული განათლებისა და გადამზადების პროგრამებში. მიუხედავად იმისა, რომ პროფესიულ განათლებაში ჩართული ქალებისა და კაცების თანაფარდობა მკვეთრად განსხვავებული არ არის (ქალები - 43%), გასათვალისწინებელია რამდენიმე ფაქტორი. ერთი მხრივ, პროფესიული განათლების სფეროში კაცებისთვის მთავარი დაბრკოლებაა ის ფაქტი, რომ პროფესიული სასწავლებლის სტუდენტობა მათ არ ათავისუფლებს სავალდებულო სამხედრო სამსახურისგან და ამის გამო წვევამდელი ასაკის კაცები უარს ამბობენ პროფესიულ განათლებაზე (ან ფორმალურად არიან ჩარიცხული უმაღლეს სასწავლებლებში და პარალელურად ეუფლებიან პროფესიულ განათლებას), მეორე მხრივ, არსებული ბარიერების გამო ქალები არ ერთვებიან პროფესიული სწავლებისა და გადამზადების სისტემაში. აუცილებელია განვასხვავოთ 15-24 წლის გოგონებისა და ზრდასრული ქალების ჯგუფების განსხვავებული მდგომარეობა. ზრდასრული ქალებისთვის ბევრად ხელსაყრელია მომზადებისა და გადამზადების კურსები, მათი ხანგრძლივობიდან და დასაქმებისთვის საჭირო პროფესიის სწრაფად დაუფლების პერსპექტივიდან გამომდინარე.

მოკვლევის ფარგლებში გამოვლენილი მიგნებების შესაბამისად მუნიციპალიტეტების მიმართ შემუშავდა შემდეგი რეკომენდაციები:

1. მიმდინარე დეცენტრალიზაციის სტრატეგიის განხორციელების კონტექსტში აუცილებელია ადგილობრივი თვითმმართველობის როლის გათვალისწინება. კერძოდ, ადგილობრივ დონეზე უნდა გადაიჭრას ტრანსპორტირების, მუნიციპალური

ტრანსპორტის, ბაღების, სკოლებისა და სასწავლებლების ინფრასტრუქტურული საკითხი.

2. საჭიროა ეფექტურად იყოს გამოყენებული ბავშვთა ოთახებზე უკვე არსებული წარმატებული პრაქტიკა (კაჭრეთი, ზუგდიდი) და, ამ მხრივ, მუნიციპალიტეტებმა გამოიყენონ ქალთა ოთახების არსებული რესურსი.
3. საჭიროა დაინერგოს სტიპენდიების პრაქტიკა, რაც მეტად გააძლიერებს გოგონებსა და ქალებს პროფესიის დაუფლების ეტაპზე.
4. აუცილებელია, შეღავათებისა და უპირატესობის მხრივ გათანაბრდნენ უმაღლესი სასწავლებლებისა და პროფესიული სასწავლებლების სტუდენტები, რაც გაზრდის პროფესიული განათლების პრესტიჟს და გააუმჯობესებს სტუდენტების სოციალურ მდგომარეობას.
5. პროფესიული სასწავლებლებისთვის აუცილებელია დუალური პროგრამების დანერგვა (ბიზნესთან თანამშრომლობით), საერთო საცხოვრებლის ქონა, ფიზიკური ხელმისაწვდომობა (ფილიალები), რათა უფრო მიმზიდველი გახდეს პროფესიული განათლება.

გარდა ზემოაღნიშნულისა, საქართველოს პარლამენტის ადამიანის უფლებათა დაცვისა და სამოქალაქო ინტეგრაციის კომიტეტის ფარგლებში განხორციელდა თემატური მოკვლევა **„შეზღუდული შესაძლებლობის მქონე ქალებისა და გოგონებისთვის ჯანდაცვის სრვისების მისაწვდომობის შესახებ“**. თემატური მოკვლევის ჯგუფმა შეიმუშავა ანგარიში, რომელიც გამოქვეყნდა 2019 წელს. ანგარიშში მოცემულია რეკომენდაციები კონკრეტული უწყებების მიმართ.

თემატური მოკვლევის ჯგუფის მიზანი იყო სამთავრობო და ადგილობრივი თვითმმართველობის მიერ დაფინანსებული ჯანმრთელობისა და სოციალური დაცვის პროგრამებში შეზღუდული შესაძლებლობის მქონე ქალებისა და გოგონების ჩართულობისა და არსებული სამედიცინო მომსახურებების შესწავლა, რათა ხელი შეეწყოს შშმ ქალებისა და გოგონების ჯანმრთელობის უფლების სრულყოფილ რეალიზაციას. ამასთანავე, მოკვლევის ფარგლებში შშმ ქალებისა და გოგონების მიერ გამოვლინდა ის სერვისები თუ პროგრამები, რომლებიც მათი ავტონომიურობის მაქსიმალურად მაღალი ხარისხის მიღწევას შეუწყობს ხელს და უზრუნველყოფს მათი ჯანმრთელობის უფლების სრულყოფილ რეალიზაციას. მოკვლევის შედეგად შემუშავდა მთელი რიგი რეკომენდაციები და წინადადებები საქართველოს საკანონმდებლო და აღმასრულებელი ხელისუფლების ორგანოებისთვის. ასევე გამოიკვეთა მიგნებები ადგილობრივი თვითმმართველობების ორგანოების საქმიანობასა და პრიორიტეტებთან დაკავშირებით.

მოკვლევის ფარგლებში თქვენი უწყების მიმართ შემუშავდა შემდეგი რეკომენდაციები:

1. განხორციელდეს სატრანსპორტო საშუალებათა და საგზაო ინფრასტრუქტურის ადაპტირება შეზღუდული შესაძლებლობის მქონე პირებისთვის, საჭიროების შემთხვევაში კი ამ პირთა ინტერესების გათვალისწინებით შეიძინონ ახალი სატრანსპორტო საშუალებები.
2. დაინერგოს შეზღუდული შესაძლებლობის მქონე პირებისათვის სივრცის მოწყობის პროცესში ეფექტური აღსრულებისა და ზედამხედველობის მექანიზმი. მისაწვდომობის უზრუნველყოფის მიზნით, კანონმდებლობისა და პროგრამების შემუშავებისას ცენტრალურ და ადგილობრივ დონეზე მაქსიმალურად იქნეს

უზრუნველყოფილი შეზღუდული შესაძლებლობის მქონე პირთა, მათ შორის ქალების ჩართულობა.

3. შემუშავდეს მხარდამჭერი პროგრამები შშმ პირების ოჯახის წევრებისთვის.
4. მუნიციპალური სპორტული დარბაზები მოერგოს უნივერსალური დიზაინის პრინციპს.
5. ღია ცის ქვეშ არსებული მუნიციპალური სპორტული კუთხეები (ე.წ. სპორტული დარბაზები ღია ცის ქვეშ) მოერგოს უნივერსალური დიზაინის პრინციპს.

მოცემული რეკომენდაციების შესრულების მონიტორინგის მიზნით, საქართველოს პარლამენტის რეგლამენტის 148-ე მუხლის პირველი პუნქტის საფუძველზე, მოგმართავთ თხოვნით, მოგვაწოდოთ სრულყოფილი ინფორმაცია თვითოეული რეკომენდაციის შესრულების მიზნით რა ღონისძიებები განახორციელა უწყებამ თავისი კომპეტენციის ფარგლებში. ასევე გთხოვთ, მიუთითოთ ის რეკომენდაციები რომელთა შესრულებაც რელევანტური აღარ არის, ვინაიდან შესაბამისი არგუმენტაციის გათვალისწინებით არ არის მიზანშეწონილი ან/და სხვა ტიპის ღონისძიებებით უკვე მიღწეულია დასახული მიზანი. ასევე, გთხოვთ, გვაცნობოთ ის შეუსრულებელი რეკომენდაციები, რომლებზეც უწყება სამომავლოდ გეგმავს მუშაობას.

დანართი:

(1) „პროფესიული განათლება ქალთა ეკონომიკური გაძლიერებისთვის“ თემატური მოკვლევის ანგარიში - 37 (ოცდაჩვიდმეტი) გვერდი.

(2) „შეზღუდული შესაძლებლობის მქონე ქალებისა და გოგონებისთვის ჯანდაცვის სერვისებზე მისაწვდომობის შესახებ“ თემატური მოკვლევის ანგარიში - 70 (სამოცდაათი) გვერდი.

პატივისცემით,

პარლამენტის წევრი
ნინო წილოსანი





თელავის მუნიციპალიტეტის მერია CITY HALL OF TELAVI MUNICIPALITY



წერილის ნომერი: 26-2621041102
თარიღი: 10/02/2021
პინი: 1513

ადრესატი: საქართველოს პარლამენტი

გადაამოწმეთ: document.municipal.gov.ge

საქართველოს პარლამენტის წევრს

ქალბატონ ნინო წილოსანს

ქალბატონო ნინო,

თელავის მუნიციპალიტეტის მერიაში შემოსული თქვენი N 557/4-1/21 26.01.2021 წერილის პასუხად, გაცნობებთ ინფორმაციას თქმატური მოკვლევის „პროფესიული განათლება ქალთა ეკონომიკური გაძლიერებისთვის“ ფარგლებში შემუშავებული რეკომენდაციების შესახებ:

1. დღეის მდგომარეობით, ქ. თელავში მოძრაობს მუნიციპალური ტრანსპორტი. 2020 წელს განხორციელდა თელავის მუნიციპალიტეტის სოფელ აკურისა და წინანდლის საბავშვო ბაღების სრული სარემონტო-სარეაბილიტაციო სამუშაოები. ასევე, სოფელ ბუშეტის ბაგა-ბაღის, თეთრიწყლების საბავშვო ბაღის, წინანდლის N 1 ბაგა-ბაღის, ლაფანყურის საბავშვო ბაღის, კისისხევის ბაგა-ბაღის, კურდღელაურის, კონდოლის ბაგა-ბაღის, ართანის ბაგა-ბაღის, ქვემო ხოდაშნის საბავშვო ბაღის, გულგულის ბაგა-ბაღის და ქალაქ თელავის ბაგა-ბაღის სველი წერტილების სარეაბილიტაციო სამუშაოები.

2020 წელს მცირე სარეაბილიტაციო სამუშაოების ფარგლებში, თელავის მუნიციპალიტეტის სკოლებში ჩატარდა არსებული სველი წერტილების სრული სარეაბილიტაციო სამუშაოები. რეაბილიტაცია ჩატარდა თელავის N 2 საჯარო სკოლის, სოფელ ნაფარეულის საჯარო სკოლის სანიორის კორპუსის, თელავის N 7 საჯარო სკოლის, თელავის N3 საჯარო სკოლის, სოფელ ფშავლის ლალისყურის კორპუსის, თელავის N4 საჯარო სკოლის, თელავის N5 საჯარო სკოლის სველი წერტილების. ასევე მიმდინარეობს თელავის N6 საჯარო სკოლაში ახალი სველი წერტილების მიშენების სამუშაოები. გარდა ამისა, ჩატარდა თელავის მუნიციპალიტეტის სოფელ ქვემო ხოდაშნის საჯარო სკოლის შენობის სახურავის და ელექტრო გაყვანილობის სარეაბილიტაციო სამუშაოები. თელავის მუნიციპალიტეტის სოფელ წინანდლის საჯარო სკოლის შენობას ჩატარდა გამაგრების სამუშაოები.

2020 წელს ჩატარდა აა(ი)პ პროფესიული კოლეჯი „პრესტიჟის“ შენობის სრული რეაბილიტაცია. შემდგომ ეტაპზე, იგეგმება გარე სახელოსნოებისა და სტუდენტური საერთო საცხოვრებლის აშენება.

2. 2018 წლიდან თელავის მუნიციპალიტეტის მერიის პირველ სართულზე ფუნქციონირებს „ქალთა ოთახი“. ოთახში მოწყობილია „ბავშვთა კუთხე“, სადაც შეიძლება ბავშვის გარკვეული დროით დატოვება.

3. მუნიციპალიტეტში პროფესიულ სასწავლებლებში სტიპენდიების პრაქტიკა, ამ ეტაპზე არ არის დანერგილი.

4. თელავის მუნიციპალიტეტში არსებული პროფესიული სასწავლებლის სტუდენტები სარგებლობენ, სამხედრო სავალდებულო სამსახურში გაწვევისგან გადავადების შესაძლებლობით.

5. 2021 წლამდე კოლეჯი "პრესტიჟი" არ ახორციელებდა დუალურ პროგრამებს. ამ ეტაპზე მიმდინარეობს დუალური მიდგომით "მევენახეობა-მელვინეობის" პროფესიული საგანმანათლებლო

პროგრამის ავტორიზაციისათვის მზადება. აღნიშნული პროგრამის შემუშავებაში ჩართულები არიან, კახეთის რეგიონში არსებული სხვადასხვა ღვინის კომპანიები.

ასევე გაცნობებთ, ინფორმაციას თემატური მოკვლევის „**შეზღუდული შესაძლებლობის მქონე ქალებისა და გოგონებისთვის ჯანდაცვის სერვისების მისაწვდომობის შესახებ**“ ფარგლებში შემუშავებული რეკომენდაციების შედეგების შესახებ:

1. ქალაქ თელავში ფუნქციონირებს მუნიციპალური ტრანსპორტი, რომელიც ადაპტირებულია შეზღუდული შესაძლებლობის მქონე პირებისათვის.

2. თელავის მუნიციპალიტეტში რეაბილიტირებული შენობების ზედამხედველობას ახორციელებს მუნიციპალიტეტის ინსპექტირების ჯგუფი.

თელავის მუნიციპალიტეტის გენდერული თანასწორობის საბჭო აქტიურადაა ჩართული მუნიციპალიტეტის ბიუჯეტის შემუშავების პროცესში. საბჭო თავისი კომპეტენციის ფარგლებში ახდენს მუნიციპალიტეტში მოქმედი პროგრამებისა და ინფრასტრუქტურული პროექტების გენდერულ ანალიზს და წარუდგენს მერიას, ანალიზის შედეგად შემუშავებულ წინადადებებსა და რეკომენდაციებს მუნიციპალურ პროექტებში მოწყვლადი ჯგუფების საჭიროებების გათვალისწინების მიზნით.

3. თელავის მუნიციპალიტეტის მერიაში მოქმედებს შშმ პირთა მხარდამჭერი შემდეგი სოციალური პროგრამები:

- საქართველოს ტერიტორიული მთლიანობისათვის მებრძოლ შშმ პირთა 18 წლამდე შვილების დახმარების ქვეპროგრამა.
- სადღესასწაულო დღეებთან დაკავშირებული დახმარების ღონისძიებების ქვეპროგრამა.
- ელექტროენერგიის გადასახადის თანადაფინანსების ქვეპროგრამა.
- დროებითი საცხოვრებლის ქირის თანხით დაფინანსების ქვეპროგრამა.
- სამედიცინო მომსახურების დაფინანსების ქვეპროგრამა.
- სამედიცინო დანიშნულების დამხმარე საშუალებების ან/და მედიკამენტების დაფინანსების ქვეპროგრამა.
- დიალიზის სახელმწიფო პროგრამაში ჩართული პირების დაფინანსების ქვეპროგრამა.
- კრიზისულ მდგომარეობაში მყოფი ბავშვიანი ოჯახების მხარდაწერის პროგრამა.

4. ქალაქ თელავში მდებარე, თამაზ ანთაძის სახელობის სპორტული სკოლის შენობის პირველი სართული სრულად ადაპტირებულია შშმ პირებისთვის, ფუნქციონირებს პარაოლიმპიური წრე ტყვიის სროლაში.

5. 2019 წელს თელავის მუნიციპალიტეტის სოფელ ფშაველაში, კონდოლსა და ლაფანყურში მოეწყო სპორტული მინი მოედნები. გარდა ამის, სოფელ რუისპირში მოეწყო ქვიშის ფეხბურთის მოედანი.

შოთა ნარეკლიშვილი

თელავის მუნიციპალიტეტის მერია-მერი

გამოყენებულია კვალიფიციური
ელექტრონული ხელმოწერა/
ელექტრონული შტამპი

